



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : f Tir Yimyim

Instagram tiryimyim@aolima

YouTube tir yimyim

TAPAK 3



Ecuador indang presidential candidate
Fernando Villavicencio khaset

Elizabeth Lee-i American Center
Kolkata nung Director mapa agizükogo

VOL. XX NO. 299 (ADOK 299) DIMAPUR ROGONÜ (FRIDAY)

LUROI (AUGUST) 11, 2023

₹ 5.00

14th NLA session tanabuba September 11 nung amentsü
Dimapur, Luroi/August 10 (TYO): Constitution of India indang Article 174 Clause (1) nung tashi agüja aliba amshia 14th Nagaland Legislative Assembly indang tanabuba session September 11, 2023 nü ayongzüker, ta Nagaland Governor sangdong ka ajanga ashi. Iba senden ya Nagaland Legislative Assembly Hall, Kohima nung anepdang 9:30 ako nungi tenzüksü, ta sangdong ajangasa ashi.

NDPP-BJP teloktepi memonui NLA ayongzüksüla: RPP
Dimapur, Luroi/August 10 (TYO): Modi sorkari yangluba mangatetep ken o ana, UCC aser The Forest (Conservation) Amendment Bill, 2023 dak sendakba nung NPF densema lokti tentet/political party balalai dangatetba lemsatepa arur. Iba tensa ya süoki ia agitsüsa aliba ajanga Nagaland nung nisung mashi kati tangbo iba ken o ana indang kanga junga angateta lir, state sorkari item tenzüng anema ola madokra iba ama legislation ya ajanga Nagaland state atema timtem ang tali ajurutsü, ta Rising People's Party (RPP) sangdong ka ajanga ashi. NDPP-BJP Coalition sorkari tekeratiba nung Nagaland Legislative Assembly indang special session ka ayongzüka Lok Sabha aser Rajya Sabha nung agizükker aliba The Forest (Conservation) Amendment Bill, 2023 ya magizükker ta pangzüng ka renemtsü aser state nung UCC ya mezüngyongi soita ayutsü akhanger, ta RPP sangdong ajanga ashi. Constitution ajanga wazüka ayuba Nagaland state raksatsütsüsa agenda, talisa The Forest (Conservation) Amendment Bill, 2023 mesüra UCC amala nungi kumzüka ayutsü nüburtem shimba NDPP-BJP Coalition dak tejangraba alitsüla, koba mapa kuma amshira Article 371A nung timtem ajurutsü, ta ashi. (Maneni tapak 2 nung...)

NPSC-i Engineering Services Exam 2023 songtemogo
Kohima, Luroi/August 10 (TYO): Nagaland Public Service Commission (NPSC) ajanga Electrical Engineering (Degree & Diploma) Combined Technical Services Exam (Engineering Services) 2023 songtemogo. "August 10, 2023 nü senden amendang Commission-i telemtetba agiba ama Electrical Engineering (Degree & Diploma) CTSE (Engineering Services) 2023 atema May 31 aser June 1 nung tatidang agibatem songtema atar," ta NPSC Secretary Nungsangmenla Imchen-i Brehostibarnü Kohima nungi sangdong ka nung ashi. Iba tatidang tanaben agitsü atema anogo ya meilongi metetdaksütsü, ta lai ashi. NPSC ajanga CTSE Electrical Engineering Exam (Diploma and Degree) songtemba aser tatidang tanaben agitsü metetdaksüba sülen Combined Technical Association of Nagaland ajanga asüng (Hokulbar) nungi tenzüka longkak aittsü aliba thiogo. Nagaland nung tejangrartem ajungtsü mechi Commission-i iba telemtetba agiba asoshi Association ajanga pela agizüka liasü. Iba tatidang agiba mapang tasüngdangba balala nung aibelen lir, anungji tatidang tanaben agitsüla, ta The Graduate Electrical Engineers' Association of Nagaland (GEEAN) ajanga NPSC nem August 3 nü takhangba ka agüja liasü. Kasa mapang CTAN-ia Diploma paper 1 & 2 nung tasüngdangba meshidak 114 aser Degree paper 1 & 2 nung tasüngdangba meshidak 83 liasü ta ashi.

Modi sorkari NE nung yimjung bener maruteter: The Naga Rising
Dimapur, Luroi/August 10 (TYO): BJP-i aniba sorkar nungi nüburtemi tashi agütsüba aser lenir tajung Ato Kilonser Narendra Modi-i Northeast region indang tepenja 'socio-political' ken o bentettsü teimla tulu liasü. Küm ter jungnüa arudang paia nüburtemi bilemba ama meinyakteter, ta The Naga Rising ajanga sangdong ka nung ashi. Northeast States ajunga nung par kisüng mesüra alliance dener yimsüsüba mendeni arudang BJP dak teimla tulu liasü. Naga solution ata alitsü ashi, kechiaser BJP-i Nagaland kidanger Assam, Manipur aser Arunachal Pradesh state tem nung sorkar tajung arudaksünü. Nagaland nung aliba nüburtemi BJP-i nangzükba 'election for solution' aremzüka ata. Ken o ketdangsüa jembitsü asoshi tekolak menden nung ken o asoshi tekeraba nung pangzüng ka bushitetsü ajaki angateter. Saka Naga accord ka ajanga Northeast nung temelenshi tulu bener arutsü ta Delhi nung aliba yimten lenirtemi mangatetra, ajibo tamachi asütsü. Kechi ajanga Delhi-i Naga nung ken o bentetba nung tetsükdaksü agütsür? Lemsar yimsü asütsü tasa den külemi tang aliba sorkar ya 'command, control and subjugation' tangatetba nung rangloka lir. Delhi nung aliba yimsüsür temi azüoktsü aser tashiyim amshitsü yimya abenba ajanga tamang makateter aser region aser yangji aliba nüburtem tali samatsür. Northeast States ajunga yimtenren nung densemer, BJP sorkari tawa agizükba Forest Conservation (Amendment) Bill 2023, tang jembio. Tai tonglokja alir nem temerenshi tesashi agütsütsü atema State sorkar aser Central sorkari tajungtiba nung meranga inyaker. Tang ama meranga inyakba ajanga yakta yimjung agi takok angutsü ta ni linük dang temolung lema ashir. Manipur nung tetsü aser jala tem dang iba linük, iba house nenok den lir ta angatetdaksüner," ta pai ashi. Manipur ya terenlok nung ano jajatsü aser Centre-i aji inyaksütsü, ta Ato Kilonser-i nüburtem dang nangzük. Northeast terenlok asoshi sorkari temolung agüja aru aser northeast ya 'jigar ka tukda' (aseni teti meima aliba) lir, ta PM Modi-i ashi. Modi-isa par sorkari northeast region ajunga renloktsü asoshi maparen balala inyakba indang jembia liasü aser paia iba tesem ya 50 ben dak tali semdangogo aser pa indang minister temia 400 dak tali semdangogo ta ashi. Ato kilonser Indira Gandhi kübok Congress sorkari ang Air Force amshia 1966 küm Mizoram nung nüburtem dak

Manipur nung yakta yimjung tanaben alitsü: PM Modi



Prime Minister Narendra Modi

amak aser 1980s mapang mitkar temi Akal Takht amak, ta pai Congress aija ashi. Manipur nung azüdokshi ajemogo: Shah Bodhbarnü Lok Sabha nung Union Home Minister Amit Shah-i Manipur indang jembidang President's Rule benoktsü aser Chief Minister N Biren Singh melentsü jembiba khenyongi tai lir, ta ashi. Manipur nung yimjung bener arutsü asoshi state sorkari Centre den amalitep akar, ta pai ashi. Manipur nung BJP sorkar alidang tesüiba küm trok tsüngta bandh, curfew mesüra mokdangba meliasü, ta Shah-i ashi. Tang Manipur nung kechi ataloker, ya tensa agi ajungmeso kin balala tsüngta rara adokba lir aser iba ya yimten ken o ka mekumdaksütsüla, ta pai ashi. "Manipur nung maksütsü mapa atalokogo. Saka ibaji ano nisung kari yimtenren den sendakteptsüba ya ang tali maksü lir. Session metenzükdang ken o jembitsü renema lir aser mapang telatet malitsüla ta shiti zülüogo. Mezüng anogo nungi jembishinütsü ni renema liasü, saka parnoki yamaji mesünü aser longkak dang aittü. Ni sangdong agütsüba parnoki magizükktetra parnoki ato kilonser indang sangdong meshila asü," ta Shah-i ghonda ana jungnüa jembidang ashi. Manipur nung nisung 152 tepsetogo aser nisung 14,898 puogo aser FIR 1,106 benoka lir, ta Shah-i ashi. Yangji paramilitary persomel 36,000 yokba sülen lendongtsüdong atalokba ajema kumogo. Indian Army, BSF, CRPF, Assam Rifles aser Manipur Police tsüngta tangatetep nung inyaksü atema 'unified command' ka tentetogo, ta Home Minister-i ashi.

colonial ruler temi amshiba 'divide and rule policy' nüchiso anguba sülena tanü tashi India sorkari amshiba ajanga lir, ta ashi. Ali aser yangji aliba rongsen mechi Northeast nung tenük yoker ta ajaki meteta lir. 2024 küm tetenzüklen General Elections agitsü lia, tang anisüngzük maka aser mangmanga aliba tensa nung ajemdaker Modi-i pa jenjang yanglushir asü? Hindu Rashtra amenoktsü asoshi lenmang lapokja Modi atema küm sük tasembuba renema lir asü? Telangzüba dang nungi tasüngdangba timba lir. Nagaland State sorkar, elected leaders, political parties, apex tribal bodies, arogo aser civil society tem saksalema ola adoktsü mapang tongogo. Asenok ola madoki malitsüla, ta The Naga Rising ajangasa ayongzük.

Japfü Christian College freshers social takok ngua agiogo



Tawa sangdongba NU Undergraduate result nung JCC nungi Gold Medal angula Ketosenü Kikhi nem tetushi agütsüba mapang tangokba noksa nung angur.

Kohima, Luroi/August 10 (TYO): 27buba Japfü Christian College freshers social takok ngua agiogo. Iba sentong nung Women Resource Development and Horticulture Minister Salhoutuonuo Kruse alaketa jaoker liasü. Sentong nung o jembiba mapang Kruse-i, mapa angutsü atema vocational aser skill based course tem agitsü koda tongtibang iba indang lemsatepaba den educational degree balala anguba ya teperi masü ta ashi.

Sorkar mapa dak dang metaloker malitsü atema skill based course tem agitsü ya lanurtem atema kanga nungdak kümogo ta shia lai, skill based course tem ajanga lanurtem nem mapa inyaksü asoshi maongka agütsütsü ta ashi. Laisa, New

Educational Policy kübok sorkari curriculum aser industry na sendakteptsütsü merangdar ta ashi.

Iba dak sendakba nung lai iba maongka ya takokba tashi agitsü kaketshirtem ayongzük aser college dang tanü industry temi kechi akhanger iba den putepa kaketshirtem nem tangazükba agütsütsü ajungshi.

Mapa balala inyaksü asoshi bendangertem aika akümba, shirnoki taa aser mapang mesükshi mapa inyaksü mulunga ali iba indang sasasetta jembiba mapang lai, Naga nunger lanurtemi item maongkatem ya agia internships agitsü aser tangazükba balala angutsü atema part time mapatem inyaksü nungdakba lemsatepa liasü.

Laisa, alimaji shirnoki ochishia, bendanga agüja meranga inyaker parnok meyong lir, ta ashi.

Maneni Minister-i, kümtem tsünga kaketshirtem aika anitetba atema college nem tenüngsang agüja liasü.

Kasa anogo Minister-isa, college kima mezüngbuba Naga Traditional Cuisine (NTC) Lab lapoktsü aser iba mapa tajung asoshi college nem tenüngsang agüja liasü. Lai, kaketshirtemi parnok indang degree den külemi aluyimba, floristry, gardening, art aser craft amala angazükettetsü ta ashi.

Maneni sentong nung JCC Principal, Dr. Visakhonü Hibo-i o jembiba mapang, 1996 küm college amenokba sülen alumni achievers 23 mapa balala nungi inyakdar aser college nungi University gold medalists 19 atokogo, ta ashi.

Sentong nungsa SDPO Jalukie, Lunso shiba JCC indang alumnus achiever ka lir pai kaketshirtem dang meranga inyaksü aser parnoki kechisa inyadir inyakaka taküm yimyayimpong azüoka aser meranga inyaka pei nükjidong tongtetsü ajungshia liasü.

College-isa tawa sangdongba NU Undergraduate result nung Gold Medal angula Ketosenü Kikhi nem tetushi agüja liasü.

7buba August Rush sentong Kohima nung Aug 15 nü agitsü

Kohima, Luroi/August 10 (TYO): Richa Productions-i ayongzükba 7buba August Rush sentong August 15 nü The Heritage, Old DC Bungalow Kohima nung agitsü. Iba sentong ya "Where Creativity Meets Skill" omen nung ajemdaker agitsü.

August Rush ya benjung tila ka lir, kong sentong ayongertemi tebilemdangba tasen lemsateptsü, nüburtemi yangluba osettsüt balala sayatsü, shishilemba balala lemsateptsü aser networking platforms yanglutsü atema sabang agütsür, ta Richa Productions, Managing Director Dr Teputo Richa-i osangbenertem den sensaksemba mapang ashi.

"Lanur start-up entrepreneur tem ajungkettsü aser tarutsü nung parnok

maparen balala atema ajungmesotsü onok nükjidong lir aser iba ajanga mapa inyaksü atema maongka tali adokdaktsütsü aser state rongsenketzüng renloka aotsü," ta pai ashi.

Anüolen aliba linüktem sobaliba agi kongshiba sülen Naga nunger sobaliba aser libaliro sama odar ta shia pai, iba tebilemstü ya temulung dang yur parnoki August Rush sentong ajanga Naga nunger maitsü ajungkettsü meranger ta ashi.

August Rush sentong ajangsa musician tem parnok sempet sayatsü aser sendakteptsü asoshi sabang agütsür aser iba den tetsür aser tebur atema fittest tetoktepba dena ayongzükba agir.

Tetoktepba tem rongnung: 2buba Umbrella Festival, 7buba

Best of August Rush (kija kentenba tetoktepba), 3buba August rush fittest man & woman tetoktepba, Flex Appeal Gym den longjemer 1buba August rush power lifting championship, Summer-Spring 2024, TS Academy den longjemer fashion show aser Talent Foresight aser entrepreneurs tem atema Best stall award densema lir.

Tetoktepba ajak nung takok angurtem nem senpet sen 10,000 agütsütsü aser tanabuba aser tasembuba jenjang nung tembanergtem nem sempet agütsütsü

Richa Productions Event Manager Medo Kense aser Event Manager Sweyiekhono Ltu na den tanga züngsemtema osangbenertem den sensaksemba mapang densema liasü.



August 10 nü Dhansiripar sub Division kübok Razhapha nung 'Meri Maati Mera Desh' campaign ayongzükba agiba mapang tangokba noksa nung angur.

Mopungchuket yimtsüng nung Handloom Expo tenzükogo

Dimapur, Luroi/August 10 (TYO): "TabaBana" ta nünjia agütsür District Handloom Expo ka Mokokchung district Public Ground nung tenzükogo. Iba Handloom Expo lapokba sentong ya August 10 nü agiogo, kong EAC Kobulong, Seyie Pfkuri, NCS, aser Functional

Manager (FM) Mokokchung, Industries and Commerce I. Nochet nati shilem agia liasü. Anogo pongu agitsü aliba expo ya Development Commissioner of Handloom, Ministry of Textiles, Government of India-i senotsü teyari agüja Department of Industries and Commerce-i ayongzükba agidar.

Mokokchung Police-i mimmozü bena alir 1 apu



Mokokchung, Luroi/August 10 (TYO): Mokokchung Police-i Settsü yim lenjem nung gari oli orartem soita bushitsüngdang asüba mapang nung Wokha district kübok alir Longsachang

yimer Wochama jabaso arishi küm 44 tain Renpothung Ezung ket nung Spasmo Proxyvon capsules 276 phone box ka nung bener lia apu ,ano yangko (sling bag) ka nung Spasmo Proxyvon capsules 136 bener liasü aser ano pa ket nungisa Spasmo Proxyvon capsules 130 pa asema IR uniform jacket yangku nung bena aliba ngutet. Renpothung Ezung ya 9th NAP (IR) Bn nung constable lir. Pa ya Tata Sumo (taxi) B/R No. NL 01 T 9627 nung mener li apu aser pa apuba mapang nung pa IR uniform jacket semer liasü. Mokokchung Police-i Renpothung Ezung apuba dak ajemdaker case ka Mokokchung PS-II C/No.0034/23 U/S - 21 NDPS Act nung zülüoker bushitsüngdang agidagi ta Addl. Superintendent of Police Mokokchung ajanga metetdaksü.

Young Talented Artistes Award Scheme atema tejangrartem jaoker

Dimapur, Luroi/August 10 (TYO): Directorate of Art and Culture, Nagaland, Kohima-i July 25, 2023 nü 2022-2023 küm atema Young Talented Artistes Award Scheme asoshi tejangrartem dang application benoktsü atema metetdaksüogo. Scheme atema shimtsü asoshi item luyim tem rongnung tetsür tebou aser tribal music/ken aser tsüngsang; Hindustani classical music/ken aser tsüngsang; theatre/tsüngsang jilushi/mime; painting, wood carvers, cane & bamboo crafts, sütakba aser teka yongsen mapa balala aser putepba amala creative arts tem densema lir.

Iba scheme atema artist ka India lisupor asütsüla, pa/la NEZCC member State tem nung alir ka asütsüla, pa/la arishi küm 18 nungi 30 tsüngda kibong makümer ka asütsüla aser National/State naroküm ngur alir ka masütsüla.

Artist temi benokba application tem den külemi

parnok kumsük kuli, Permanent Residency Certificate aser parnok performance/noksa, scan disk/ pen drive nung video yanglua inoker yoktsüla. Artist shirnoki iba scheme asoshi apply asütsü tejangraba lir parnoki Office of the Director, North East Zone Cultural Centre, Dimapur mesüra member State tem indang Directorate of Art & Culture/ Cultural Affairs nungi form agizüka benoktsü nungdaker. Iba scheme asoshi temsüa aliba artist tem dang application ya scrutiny, interview/ Demonstration aser tatembangbuba shimshitsü atema NEZCC dangi yoktsü asoshi pei state nung Director, Department of Art & Culture/Cultural Affairs nem application tem agütsütsü mepeshia metetdaksüogo. Scheme asoshi apply asütsü jangrartemi parnok indang application ya September 10, 2023 nü tashi nungbo Directorate of Art and Culture, Kohima nung benoktsü metetdaksüogo.

NDPP-BJP teloktepi memonui... (Tapak 1 nungi...)

Anungji The Forest (Conservation) Amendment Bill, 2023 mesüra UCC nungi state kumzükba/wazüka lir ta Chief Minister-i yimjak nung sangdongtsü madoker, ta ashi. Regional party ama inyakba sorkari kechi südir süaka state indang litsü-lika wazüka ayutsüla. Ajisüaka tanü tashi ken o aika nung 'majoritarian politics' matsüngdang tasümaim mesüra central funds anentsü tetsübo nen kokdakja aruba angur, ta RPP ajanga ashi. Linük meimba aser terenlok

aliba Kerala Legislative Assembly nungbo UCC anema pangzüng ka agizükogo, koba linük nung mezüngbuba alitsü ta NDPP-BJP Coalition dang nenshia ashir. "Anungji nisung ajak molungjang nung tasüngdangba ka alibaji, central sorkari UCC aser The Forest (Conservation) Amendment Bill, 2023 ajanga tashiyim amshiba nungi iba Coalition-i asenoka kumzükba/wazüka ayutsü asü masü?" ta RPP sangdong ajangasa ashi.



August 10, 2023 nü RBI headquarters, Mumbai nung osangbenertem senden ka nung jembitsü atema Reserve Bank of India (RBI) Governor, Shaktikanta Das den Deputy Governors- Michael Debabrata Patra, M. Rajeshwar Rao, Swaminathan Janakiraman aser Rabi Shankar nung arudang tangokba noksa nung angur.

Supreme Court obendang melentsü atema Centre-i bill ka benok

New Delhi, Luroi/August 10 (Agencies): Chief Election Commissioner (CEC) aser Election Commissioners (ECs) shimba inyakim dak sendakba nung tamalen Supreme Court Constitution bench kati obendang agüja aliba melentsü atema Brihostibarnü Centre sorkari Rajya Sabha senden nung bill ka benokogo. Tamalen Supreme Court-i, CEC aser ECs shimba committee nung züngsem asemji Ato kilonser, Chief Justice of India aser Lok Sabha nung Opposition Lenir asütsüla, ta metetdaksü, ajisüaka Centre sorkari benokba Bill nungji, CEC aser ECs shimba Selection Committee nung züngsem asemji Ato kilonser, Ato kilonseri shimba Cabinet minister ka aser Lok Sabha nung Opposition Lenir aser asütsü, ta shia lir. Iba tetezü iba committee nungji Chief Justice of India

züngdoker aser Ato kilonseri shimba minister ka züngoktsü. Congress aser AAP densema opposition party temi, iba bill ya Supreme Court Constitution bench ka obendang alema lir, ta shia longkak aitba mapang nung iba bill benok. Taküm March ita nung Supreme Court Constitution bench kati, CEC aser ECs ji Ato kilonser, Opposition Lenir aser Chief Justice of India nungeri benokba nung ajemdaker linük Tiri shimtsü, ta oshidang agüja liasü. Sangküm February 14 nü Election Commissioner, Anup Chandra Pandey kümsük abensaba sülen menden nungi anisüngzüksü lia sorkari bill tasenba ya benoker. Sangküm Lok Sabha election agitsü atema sangdong agütsütsü mapang ana nung lia Anup Chandra EC menden nungi anisüngzüka menden ka tazüing adoktsü.

Iba bill anema Congress lenir, Randeep Singh Surjewala-i, iba ya India nung democracy atema 'Tanak Anogo' ka lir, ta ashi. Paisa, Modi sorkari 'Election Commission of India' ya 'Modi Election Commission' kümtsüner, ta aitsü. Surjewala-i twitter ajanga, "State pongu nung tamakok angutsü aser 2024 Lok Sabha elections nunga tamakok angutsü, ta meteta Election Commissioners (Appointment, Conditions of Service And Term of Office) Bill, 2023 ya benoker; iba bill ya 'Modi Election Commission' tentetba sülen Democracy züngdoktsü atema asalentong tamajung ka lir," ta aitsü. Senior advocate, Prashant Bhushan-i, iba bill ya Parliament nung agizükyonga linük temzüng alema asütsü, aser Supreme Court-ia iba bill agientsütsü akok, ta ashi.

Supreme Court-i Manipur nung yimjung atema luden ka tentet

New Delhi, Luroi/August 10 (Agencies): Manipur nung yimjung atema inyaksü aser teyari agütsüba maparen ketdangsüa reprangtsü atema Supreme Court-i high-powered committee ka tentetogo aser iba committee nung züngsemtemji retired judge tetsür asem lir. Manipur nung BJP sorkar aser Centre sorkar napronglai Manipur nung rara manokdangtetba ajanga August 7 nü Supreme Court-i luden ka tentettsü teletmetba agia liasü. Iba committee nung tongtiji taoba mapang Jammu & Kashmir High Court nung Chief Justice, Gita Mittal asütsü aser züngsem anaji- taoba mapang Bombay High Court nungi Justice Shalini Phansalkar Joshi aser taoba mapang Delhi High Court nungi Justice Asha Menon na lir. August 8 nü osangbener den jembidang Arogo lenir kati, "Court tetuyuba ya mera tuluka agiba lir, kechiyong state sorkari yimjung atema kecha meinyaker," ta metetdaksü. Paisa, joko tang nungibo Manipur nung rara ajanga takoksa angurtemi ken o

benoktettsü aser teyari meshitettsü, kechiyong tetsür judge temji ajak tanga states nungi lir, ta ashi. Chief Justice D Y Chandrachud-i aniba Supreme Court bench-i züngsem asem aliba committee dang, Manipur nung teyari agütsüba maparen ketdangsüa reprangtsü, rehabilitation, kiojen aser tekülem kitem yangershiba reprangtsü tuyuogo. "Iba ya oziung dak tamang kadaktsütsü aser nüburtem nem melung lemtetdaksütsü atema lir," ta SC bench-i metetdaksü. Supreme Court-isa Manipur nung tetsürtem dak tim mesüi beshiba ken o 11 ketdangsüa reprangtsü atema Maharashtra nungi retired police officer, Dattatray Padsalgikar shimogo. Item ken o ya Central Bureau of Investigation (CBI) nem agüja lir. Supreme Court-isa state sorkar dang, ken o 6,000 dak tema bushisingdangtsü atema lemsütsüba special investigation team 42 mita reprangtsü atema tanga states nungi police inspector ka aser police officers trok shimang, ta tetuyuba agütsüogo.



August 10, 2023 nü New Delhi nung Congress Tir aser Rajya Sabha nung Opposition Lenir, Mallikarjun Kharge indang Parliament chamber nung INDIA teloktep nungi lenirtem senden amendang tangokba noksa nung angur.

Elizabeth Lee-i American Center Kolkata nung Director mapa agizükogo



Elizabeth Lee-i Kolkata nung aliba American Center nung Director mapa agizükogo.

Kolkata, August 10 (Agencies): August 09, 2023 nü Elizabeth Lee-i American Center Kolkata nung Director mapa aser Kolkata nung U.S. Consulate General kübok Public Affairs Officer (PAO) mapa agizükogo; lai taoba mapang Director aser PAO, Adrian Pratt melenzüker. Lai, "Ni Kolkata-i aruba aser India anüdoklen aser northeast nung United States of America atema inyaksü maangka anguba atema kanga pelar. Ni nüburtem den sendaktepa parnok sobaliba angazüktsü aser iba region nung US-India tesendaktep tajungba akümtsü atema longjemer inyaksü yongyar," ta metetdaksü. Elizabeth Lee-i tamalen

Riyadh, Tokyo, Islamabad aser Lahore nunga menden balala nung tenzüka aruogo. Washington D.C. nung la Bureau of Population, Refugees & Migration (PRM) nung 'join' asüba sülen Moldova densema Europe tesem balala nung refugees teblemtsü onük atema inyaka liasü. La Counterterrorism Bureau's Office of Global Coalition to Defeat ISIS (CT/SECI) nunga unit nung tongti inyaka liasü. 2009 küm la State Department nung join süa liasü. Elizabeth Lee ya West Virginia nungi lir; lai Marshall University nungi journalism degree ngua liasü aser lai Japanese, Urdu aser Arabic oshitem-a jembiteter.

**GOVERNMENT OF NAGALAND
MINORITY AFFAIRS
PLANNING & TRANSFORMATION DEPARTMENT
NAGALAND : KOHIMA
ADVERTISEMENT**

Kohima, dated the 5th August, 2023

NO. MINORITY/1-ESTT/1/2023: In pursuance of the approval of the Cabinet vide No.CAB-1/14/2023 dated 06.04.2023 and notification of the P&AR Department vide No.AR-15/1/85 (Vol-I) dated 28.04.2023, and in continuation of this office advertisement of even number dated 2nd May 2023, applications are invited for filling up of the following vacancies on redeployment under the Directorate of Minority Affairs, Government of Nagaland in the manner prescribed below:-

A. NAME OF THE POST FOR RE-DEPLOYMENT:-
Item No. 1 : 1 (One) Upper Divisional Assistant(UDA) post in the Pay Level-8.
Item No. 2 : 2 (Two) Lower Divisional Assistant(LDA) posts in the Pay Level-5.

B. ELIGIBILITY CRITERIA:-
i. This will be applicable to all serving UDAs/LDAs from the Directorates having more than 30 ministerial staffs viz. Health & Family Welfare, School Education, Industries & Commerce, Works & Housing, Animal Husbandry & Veterinary Sciences, Soil & Water Conservation, Agriculture, PHQ, EF&CC, NST, Food & Civil Supplies, Nagaland Civil Secretariat, Chief Engineer Power (Transmission & Generation), Water Resources, Social Welfare, Geology & Mining, Cooperation, Treasuries & Accounts.
ii. The applicants should be proficient in practical office computer applications
iii. Preference will be given to applicants recruited through NSSB and DRB

NOTE :-

- Applications should be addressed to the Director, Directorate of Minority Affairs.
- The candidate is required to submit all requisite documents including biodata/service details/experience etc. along with the application.
- After scrutiny of the applications, suitable candidates will be shortlisted and called for interview/ personal interaction by the Selection Committee.
- The last date for submission of applications is 21st August 2023.

Sd/- R. RAMAKRISHNAN, IAS
Principal Secretary & Dev. Commissioner



TIR YIMYIM

YIMOBILEM (EDITORIAL)

DIMAPUR ROGONÜ, LUROI(AUGUST) 11, 2023

Temeshi Aini Aoba

- Tangsen Lemtur

Tang mapang ya Hindu nung tamangertem temeshi aini aoba 'Amarnath Yatra' mapang lir. Küm shia parnoki anogo 20-60 tsüngda telok-telok lemsar Amarnath tekülem ki tashi tetsüng agi anogo ainü jajar. Yamaji parnok temeshi aini aoba mapang nung lendong balala ataloker- kar rürjep agi anenbanga asür, kar tangu mesashiteti asür aser karbo temelungjang tashidak agi asür. Iba tekülem ki ya Jammu & Kashmir nung Anantnag ditric kübok Pahalgam jila nung lir. Amarnath tekülem ki ya rürjep aliba tenemlen lungki ka nung lir aser iba lungki ya Hindu nung tamangertem atema kanga temeshi ta züngshir. Yaküma Hindu nung lakh 3.65-i Amarnath semdanga liasü. Ano külen Muslim nung tamangertem temeshi aini aoba dang 'Hajj' ta ajar. Islam yimsü amangertem atema temeshitiba tesemji 'Mecca' lir. Mecca ya Saudi Arabia nung Mecca Province yimtiba lir. Mecca ya Islam yimsü tamendakdak tesem lir aser Muslim nung ainkar, Muhammad asoba tesem lir. Yamaji alima tesem balala nung Muslim nungertemi sarasademdang Mecca tsütsülen shir sarasademer. Mecca nung aliba tongti mosque dang 'Masjid al-Haram' ta ajar; iba nungji Ka'bah lir aser Muslim nungertemi Ka'bah ji Abraham aser par jabaso Ishmael nati asüba lir, ta amanger. Taküm-a June-July nung Muslim nung million 2 dak temai Mecca semdanga liasü. Yamaji alima tesem balala nung alir Khristantemia Israel-i temeshi aini oa Yirusalem nung temeshi tesemtem, Nazareth aser Yordan ayong densema tesem balala semdang. Khristantemisa Yisu Khrista kodaki ayipa atuba Olive tenem aser Bethlehem nung Yisu asoba tesem (tang iba tesem nungji Church of Nativity lir) semdang. Yirusalem, Temeren tzüym, Nazareth, Bethlehem, Yericho, Egypt aser Yordan ayong nung tatalokbatem aser Yisu alima nung alidang Pai inyakba sayatenya otsütem asenoki Laishiba nung azünger aser sayutsüngirtemia ashir, saka asenok aikati Yisu-i tetsüng ajemoka jajaba tesemtem kodanga mengudang. Atangji Khristantem dangbo akümüli nung khenbosa Yirusalem semdangtsüla ta mashir, ajisüaka takoktsü dang süra asenokisa item temeshi tesemtem semdang nung kanga temoatsü angutsü südi ta bilemer. Alima tesem balala nungi temeshi aini Israel-i oa temeshi tesem balala semdang Khristantemi atangji tanela nung temoatsü aser tesünep anguba aikati lemsateper. Khristantem atema temeshi aini aobaji yamai ratetja lir, "Israel nung tesem balala semdanga alima tepor ajung mesüra putiotsü angazüktsü atema dang masü saka Tsüngrem jungkai adokba tesemtem semdanga atangji Tsüngrem ajurua tanela aintsü atema lir." Temeshi aini aoer Khristantemi talisa Yisu asoba tesem, Pa tou-ashiba tesem, Kangkidong nung metaba tesem, tasü nungi shia aruba tesem, Pa tzüsenba ayong (Yordan) aser Pa kodaki ayipa atuba tesemtem semdang. Temeshi aini aoer Khristantemisa Peter aser Paul asüba yimti (Rome)-a semdang. Khristantem atemabo temeshi aini aotsüji ozüng ka masü; pei melung, ajisüaka Khristantem aikati Tsüngrem den tesendaktep tajungba yanglutsü aser tamang jenjang tashi itshitsü nükjidong nung Yisu Khrista alima nung aliba mapang Pa senzüba tesemtem semdang. Asenoka takokertemibo, talisa Arogo nung toklang tenzükertemi akümüli nung khenbosa Yirusalem densema temeshi tesemtem semdang nung atangji temoatsü asütsü. Arogo nung toklang tenzükertem temeshi aini Israel-i otetra ibaji aika atema temoatsü asütsü südi, kechiyong parnok temeshi ain nungi meyipa arur sayutsüngibajibo khenyongi balaka asütsü ta bilemer.

OLEMSABANG

TARUTSÜ PUTU ASOSHI TANÜ LIPOKUM JENJANG

- Miss. Yapanginla, Source: Otongdar

Tanü asen lima lipokum jenjang tamajungba akümba angur. Iba tatalokba ya asenoki tzü aser mopung nung tejangja angur, arem aser ali samaba nung angur, ayong aser tzüym menena akümba nung angur, iba khuret ya tanü atema dang masü saka tarutsü putu (future generation) asoshia tebilemtsü lir. Item lipokum tebilemtsütem ya kanga lendong ta agitsüla lir. Iba alima ya aneptsü asoshi asen kiroluro (economic life) aser lipokum tayimdong (environmental commitment) ji kulemi mapa inyaktsüla.

Tanü Lipokum Tensa (Ecological Crisis)

Development tenüng nung nisungi lipokum ya mebilemdangi raksatsür. Meimchir ya Tsüngremi yanglu aser pai asenok nem teinyaktsü nunglokja lir. Iba teinyaktsü rongnung tongtibang kaji, iba alima anebalutsü ya lir. Saka nisungeri iba temeshi teinyaktsü ya zütoka toktsür, chidiyungdi agi sünger iba alima ya teraksa agi bener arutsür.

Tazüokba melei dang shiruru aser süngdonglidong raksaba ajanga asen ecosystem nung tataktet (balance) melei kümogo aser iba yagi meimchir nem takoksa jenjang bener arutsür. Asenoki mekümdangi iba alimai moatsüba rongsentem talubosa amshir aser asenoki iba alima ya tamashi nung dang yimsü asür. Asen meimchir ya tangar dang nendaka semloka (inter dependant) aliba nisungtem lir aser asenok kisüng dangbo iba alima nung melitetsü. Saka asen libaliro nung iba ya meshisadanger. Asenoki lipokum nem akhüm tsübu magütsüba ajanga taküm jenjang (quality of life) kanga ajema kümogo. Tanü nisungtem aikati ajaklen lipokum teraksaba jenjang ya ngur sülen, iba alima rongsen ya taoba ama sensa-masa mamshitsüla ta angateta arudar. Alima tanishir aika iba mapati nung temulung agütsüa akümer aser tetangshi nisungtem telemsa (discipline) balala nungi iba asoshi study süa kümogo.

Iba tensa ka nung, teyangluba (creation) ajak külemi tashi kangshia anüngdang (Rom 8:22) asen khristan tema laishiba ratetba ajanga iba tatalokba yanglushitsü merangdanga arudar. Lai tekong rasaba nung, laishir (biblical scholars) temi lai otsü aser tanü tatalokba lipokum tasüngdangba (ecological questions) tem tsüngda nung tesendaktep bener arutsü meranger. Iba terasaba nükjidong ya nisunger talisa khristan tem asoshi tangatetba agütsütsü aser lai o azüngba dang masü saka mapa küma (praxis) alima nung teyangluba (creation) ajak anepalutsü bushiba lir.

Iba ecological issue nung ajemdaker lai o meyipba reprangshiba ya khristan lokti (community) aika nung lendongsa kümogo. Iba Eco theology ya tanü nüngdakba bushiyim ka kümogo aser iba terasaba amshiba ajanga scholars temi lai tekongtem koba nung teyangluba (creation) aser lipokum (nature) indang shia lir ibaji bushiteta azünger (e.g., lipok 1-2; 6-9; Levi 25; Yob 37-39; T.Ken 8; 19; 24; 98; 104; Isa. 9-11; Mathi. 6:28-30; Rom. 8:18-23; Kolosi. 1; Jungkai Adok. 21-22).

Tsüngremer Alima Tajung

Laishiba nung yamai ashir "Aser Tsüngremi pai yangluba ajak angur, aser ajiang, ya kanga junger liasü" (Lipok 1:31). Kotak aser alima, anü aser ita, ali aser tzüym, ango aser ozü, shiruru aser nisung ajak ji tajung liasü. Iba alima ya teyangluba (creatures) ajak nem agütsüba lir atangji Noah tezüngzüktepba nung teyangluba (creature) ajak liasü (Lipok 9: 9-11). Tsüngremi pai yanglubatem ajak anepaluba (nurture) ya kuli asü dang jangratemtsü lir aser tetenzuk nungi meimchir aser teyangluba ajak sentaktepa alitsüji Tsüngremer sentong liasü. Alima rangben telungtet ajak Tsüngremer temeshi nung shilem agir aser alima nung aliba ajakji Tsüngrem den sendaktepa ali nung ajakji temeshi (sacred) lir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Oklahoma nung aliba Life.Church nung nisung 2,000 baptiogo



Oklahoma yimti nung Pastor Craig Groeschel-i tenzükba Arogo, Life.Church nung baptiba mapang tangokba noksa nung angur.

August 10, 2023: Oklohama yimti nung Pastor Craig Groeschel-i tenzükba Arogo, Life.Church nung taoba hopta tatembanglen nisung 2,000 dak tema tzu nung baptiogo.

Arogo indang campus 40 shi nung nisung 2,000 dak tema bapti.

Osang angazükba agi, Life.Church campuses nung adener nisung 80,000 dak temai nisung 2,000 dak temai Yisu Khrista agizüka tzu nung baptibaji kuli süa liasü.

Nisung 2000 dak tema tzu nung baptiba sentongji minute 20 shi agia liasü aser tetsüsabuba aiür ka baptiba mapang nung loktii teka maa liasü.

Pastor Groeschel-i, "Ni asen Arogo nung züngsemtem meimba lemsateper aser tanü tzu nung baptirtem dang ya ashir,

Yisui nü taküm nung inyakba mapatem atema asenoki Tsüngrem nem tenüngsang agütsür," ta metetdaksü.

Paisa, Arogo tenzükba sülen nisung teimtiba tzüsenbaji iba ya lir. 1996 küm mezüng Life.Church nung baptir ka iba sentong nung adenba ngua pa melung raksa, ta ashi.

"Iba mapang nungji (1996 küm) nisung pongu shi baptija liasü. Iba sülen küm 25 shi lir tang kasa Arogo nung nisung 2,000 dak tema baptiogo," ta pai metetdaksü.

Groeschel-i, "Tsüngrem ain senzüdar. Asenoki revival ka atema sarasadem masür, ajisüaka asenok revival tiyongtsü nung lir aser Tsüngremi inyakba mapatem atema ni Tsüngrem nem tenüngsang agütsür," ta ashi.

Iba sentong nungji jembidang Pastor Laurie-i, "Nai nü taküm tejenba dang tatembang salem ashir, kechiyong na baptiba mapang nung taküm tejenbaji Khrista den külemi remogo, koba ajanga nai lenmang tasen nung jajatsü; ibaji Laishibai ashir," ta metetdakja liasü.

Arogo aika nung meiwa mapang nung baptiba sentong ayongzuka agir. Taküm June ita nunga Oceans Church nung Baptize SoCal sentong ayongzuka liasü aser iba sentong nungji Arogo 280 dak tema aser nisung 8,000-i kulisüa repranga atadang nisung 4,166 baptia liasü.

Taoba ita Harvest Christian Fellowship nunga Pastor Greg Laurie-i ayongzükba sentong ka nung nisung 32,500 aden aser nisung 6,794 baptia liasü.

Haiti nung America tsür missionary nurse den lar jala na chiokogo



Alix Dorsainvil aser lar jala na noksa nung angur.

August 10, 2023: July 27 nü New Hampshire nungi missionary nurse, Alix Dorsainvil aser lar jala na Haiti yimtiba, Port-au-Prince anasa Christian education ministry, El Roi Haiti indang campus ka nung lia prangpong amer telok kati puer oa liasü, ajisüaka tenaprongla chiokogo, ta Bodhbarnü El Roi Haiti organization-i metetdaksü.

El Roi Haiti ketdangsertemi parnok indang website nung sangdong ka ajanga, "Ozü staff aser medemer Alix Dorsainvil aser lar jala na chiokba atema onoki tepela lemsateper. Sarasadem

langzüba atema tanübo onoki Tsüngrem nem tenüngsang agütsür," ta metetdaksü.

Alix Dorsainvil aser El Roi Haiti tentetsang, Sandro Dorsainvil na 2021 küm kibong küma liasü. 2010 küm nungi tenzükba lai mapang shia Haiti semdang aser 2020 küm nungi la iba organization nung nurse inyaka liasü.

Osang angazükba agi, July 27 nü la clinic ka nung shirangertem yariba mapang nung prangpong amer telok ka aruba sülen la den lar jala na puer oa liasü. Prangpong amer telok jagi la den lar jala na chioktsü atema dollar sen

million 1 takhangba agüja liasü.

Ajisüaka la kümzüksü atema inyaker U.S. Department of State mesüra Haiti nung ketdangertemi prangpong amer teloki akhangba ama parnok nem senji agütsür asü magütsüar kecha memetetdaksü.

El Roi Haiti-i sangdong ka ajanga, "Iba ama timtem mapang nung onok den longjemer sarasademertem aser onok nungiter ajak dang onoki pelaba lemsateper. 'El Roi' tetezü Hebrew oshi nung 'asenok anguba Tsüngrem' lir," ta metetdaksü.

ANOGO ABEN TSÜNGREM DEN

Telangzüba Kaket T.Ken 119:129-136

Nai mangatetba ammag aser anüng akongba ajangshia arua lir asü? Anogo karbo kanga jangramatem süidaksür. Ken ken asenoki ammag ajanga süir aser Tsüngremer lima nung kechi ataloker ta süngmanger. Mesüra asenoki yasa tzüraba ajurur- tanelaren asenok takong, ayar aser tzüar.

Mangateti alir dang telangzüba kechi agütsür? Tsüngrem O. "Ne temelaba ozüngtem tesüngmangtsü lir, aji asü nung ni itemji benshitsü" (t.129). Kodang asenoki Laishibaji züngdir aser tashi angadir takümüji memetetba taküm ka masütsü. Iba yagi atamata takümüji tesüngmangtsü taküm kümdaksür. Kodang asenok tekolok aser temulungjang Laishiba agi sünga lidir, asenoki anguba ajak balaka asütsü.

Ammag nung telangzüba kechi? "Ne o tem lapokba agi tesangwa agütsür, iba yagi tongmelang purtem nem tangatetba agütsür" (t.130). Lapokba tetezü aيتدaksüba, Tsüngremer O lapokba. Tsüngremi asenok dang rasa ashidang asenok sangwadaksür aser peladaksür. Tanü nai ammag ajurura, ne Laishiba züngang aser iba jagi ne nem tesangwa agütsütsü. Tzüraa alirtem dang telangzüba kechi? Ken ken asenoki kecha maka ama bilemer aser nüngdak adoker. "Ni tangu sadema tebang kaar ali, kechiyong ni ne temelabatem yongyaa ataa ali" (t.131). Tsüngrem O ji mopung temerük ama lir. Kodang asenok tzüradir tzüratemdaksür aser asenok ayadang ibai chiyongtsü ama lir.

Nai takong, ammag, mesüra mangatetba kodang ajurudir Tsüngrem O dangi meyipang. Iba ochi jagi ne tanela sangwatsütsü aser iba tenangzükbatemi na tasü itdaksütsü. Ne nüngdak peridaktsütsü asoshi Tsüngremi Laishibaji asameyang. Anungji kodang tasü maittsü anogotem arudir, ne kolok aser ne temulungjang o jagi mesüang.

WCC nungi telok kati Colombia semdanga yimjung atema jembir

August 10, 2023: World sentong nung aden.

Council of Churches (WCC) Iba Conference nung nungi telok kati Colombia Mtata-i okila jembir aser sorkar, Arogo aser nüburttem sorkar ketdangsertem den den linük nung yimjung maliba yimjung atema inyakba telok atema tesasaba lemsatepba balala nungi lenirtemia shilem den külemi linük nung yimjung agia liasü.

atema inyaktsü asoshi Iba Conference nung jembishinüdar. shilem agirtemi linük nung

WCC nungi telok kati yimjung tsütsü tetsükdaksü August 8 nungi August 11 balala metetdaksüba den tashi Colombia semdang. külemi praongpong amer

WCC programme director telok balala den ken o Rev. Dr Kenneth Mtata jembitsü atema leniba nung WCC nungi jembishinüogo.

zungsemtemi Colombia nung Mtata leniba nung linük nung tongti Colombia semdang WCC ketdangsertem, partners aser züngsemtemji Presbyterian Latin American Conference Church of Colombia nungi lenirtem ajuruba den külemi Rev Vilma Yanez; Dr DiPaz (Interchurch Dialogue HC.Humberto Shikiya, WCC for Peace in Colombia)-i regional representative to ayongzükba International Colombia peace process aser Conference for WCC staff Dr Marcelo Reconciliation in Colombia Schneider nung lir.

AO OSHI ANGAZÜKDAK:
TANÜ ANGAZÜKTSÜBA OJANG



Rongnung

(conj) telok nung (among)

* Nisung aika rongnung lenir asütsü Moaba shimtet.

Rungrep

(v) mi agi kecha manüng arung (burnt completely)

* Imphal nung ki aika **rungrepa** rungogo.

OLONG PAITEP # 6602

	1		2			3		4		5
6								7		
					8		9			
			10							
11										
				12						
13		14		15						16
17										18

TIPIEN

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S _ _ _ _ - (4)
- 13. Yagi ajak ashioxtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

LANGTSÜNGLEN

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. _ _ _ hi - (3)
- 16. Akümüli nungi pilar - (3)


OLONG PAITEP # 6601 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

LANGTSÜNGLEN :

- 1. Tenükjang, 2. Luden, 3. Kioxtsü,
- 5. Lenti, 7. Tajangzük, 11. teronem,
- 12. Sempa, 13. Jahaz.



PASTOR KATI KANGKI TILALA
YANGLUTENA YUR SENTEP TEMER
ALEMER :

Pastor : Asen arogo nung Deacon board kanga shisa kaa rongsen jenti lalua Kangki tila aika nenok sentepi arur ajak ataa yanglua lir, iba inyakyim nükjitungji iba Kangki ya apu-ani koba taktang nung tali ratateper, idakji ayutsü, kodang rarapangsen tenzükdir iba Kangki dak rangloxtsü aser idangji Yisui repranger ama pilema nena rara anentsü, anungji nenok ajak kaka meshiang.

Warakla : Pastorba, nibo pungu nungdakja no.
~ **Lilir** : **WhatsApp**

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Manipur MLA 40-i PM nem takhangba agütsü



Imphal, Luroi/August 10 (Agencies):

Manipur nung MLA 40-i Ato Kilonser Narendra Modi nem tezüluba nung takhangba ka agütsüogo, kong state nung yimjung bener arutsü atema inyaksangshitsüba densema lir. MLA tem ya timba Meitei nungertem lir.

Manipur nungi MLA 40-i tezüluba nung takhangba agütsüba nung takhangba trok densema liasü, kong tribal tem atema administration balaka medentetsütsüba densema lir.

Parnokisa Manipur nungi Assam Rifles sepaitem ajunga anintsü asoshi takhangba agütsüogo.

"Assam Rifles (9, 22 aser 37) tang aliba tesem nungi anina temulunglemtsü akokba central forces tem den state security-i parnok melena mangatettep adoker aliba tesemtem nung amokmerentem agintsü aser tensa azüoktsü akoktsü," ta takhangba nung shia lir.

Maneni Ato Kilonser dangi yokba takhangba nung prangbong hadir balala amshiba ajak sota yimjung aser security atema jenjang tapet agitsü ayongzükogo.

Maneni MLA 40 yagi, tribal tem atema state nung administration balaka metentetsütsü asoshi takhangba agütsüogo.

"ITLF/Kukis-i administration balaka akhangba ya khenyongi agizüktsü makoktsü," ta takhangba nungsa shia lir.

Parnokisa, suspension of

operations (SoO) tenangzüktepa takaratiba nung agintsü atema takhangba agütsüogo.

MLA 40 yagisa, prangbong injang bener bendangertem aika state-i senoka aitba indang metetdakja liasü.

Tanga takhangbatem rongnung NRC benoktsüba, autonomous district councils (ADCs) akangshitsüba aser yimjung asoshi sensaksem akatsü atema jenjang tapet agitsüba densema lir.

Kasa mapang nung Manipur nungi Kuki-Zo-Hmar tribal MLAter, shirnoki administration balaka asoshi khanga arudar, parnoki Ato Kilonser Narendra Modi dang Manipur nungi Assam Rifles sepaitem magintsü atema takhangba ka agütsüogo.

Brehostibarnü PMO dangi tezüluba nung takhangba ka yokba nung parnoki PM dang Manipur nung tang kin o kin tsüngda mangatettep adoker aliba bentetsü atema jenjang tapet agitsü mepeshia asüngdangogo.

Manipur Legislative Assembly nung züngsem 60 nungi Kuki-Zo-Hmar tribal MLA 10 lir aser parnoki administration balaka asoshi takhangba agüja arudar.

Takhangba agütsüba nung tribal lenirtemi PM dang Manipur nungi AR magintsü asoshi takhangba agütsüogo, kechiyong iba ajanga tribal tem lendongi aitsü, ta ashi.

Parnokisa, PM dang state sepaitem aser parnoki tashi amshiba azüoktsü aser state nung yimjung adokdaksütsü atema central paramilitary force temi nüka aliba buffer zone tem nung parnoki inyaksangshi masütsü atema tetuyuba agütsütsü mepenshia asüngdangogo.

Manipur nung May 3 nü nungi tenzüka kin o kin na tsüngda mangatettep adokba sülen Kuki-Zo-Hmar tribal tem aser Meitei nungertem yongtsü nung temulung melemtepa adokogo aser iba ajanga state MLA tem den telok ana küma lemdangogo.

Manipur state police-i, tongtibang tesemtem nungi AR post tem agintsü tenzüko aser parnok inyaksangshi mesademi kümdaksütsü atema teyazü FIR tem benoka arudar, ta parnokisa ashi.

Assam Rifles sepaitem timba Northeast kübok state balala nung lir aser parnoki mapang talangka nungi Manipur nüka aruogo, anungji parnoki local tem inyaksangshi kanga junga meteta lir.

Parnokisa, Assam Rifles (AR) koba tetsü tasoli India telung aser tema kümzüka ayuba security forces tejentiba lir parnok ya ajaki meteta lir, ta ashi.

Manipur nung azütokshi lendong atalokba sülen tang tashi nung nisung 160 dak tema süogo aser aika pei talidak ki toktsür jenshiaogo.

Assam: CPI-i Labour Code 2023 anema longkak ait

North Lakhimpur, Luroi/August 10 (Agencies): Communist Party of India (CPI) Lakhimpur district unit-i Brehostibarnü 81buba Quit India Movement anniversary nungdem nung Labour Code 2023 tasenba anema longkak aitogo.

Iba sentong ya Lakhmpur-CPI, secretary Arup Kalita lenisüba nung agi aser All India Trade Union Congres (AITUC), Centre of Indian Trade Unions (CITU), Trade Union Coordination Centre (TUCC) aser lokti tentet balalai shilem agia liasü.

Longkak aitertemi CPI indang district office nungi tenzüker District Commissioner indang office tashi North Lakhimpur yimtung süa ao.

Parnoki centre aser state sorkar anema yimyim ayim aser

Labour Code 2023 agintsü khanga liasü. Parnoki ashiba agi, Labour Code tasenba benokba ya democracy anema lir.

Labour Code ya 2020 küm table asüba mapang nungi CPI-i iba ya agintsü asoshi khanga arudar.

Party-i talisa code nung provisions kar ajanga mapa inyaker 300 tashi aliba company kati state sorkar temelaba magi-i nüburtem mapa nungi agintsü aososhi temelaba agütsür aliba anema arudar.

Taoba mapangbo iba facility ya nisung 100 tashi aliba company tem nem dang agüja liasü.

CPI-isa, iba code yagi Provident Fund due tem magütsüba atema temerenshi kecha melei mapa inyakertem kümzüka ayutsü atema temzüng

ozüng kübok tenügdakbatem sentoka toktsütsü atema employer asoshi temelaba kümdaksür, ta ashi.

Labour Code ya Parliament nung 2020 küm September 23 nü agizüka liasü.

Longkak aitertemi ashiba agi, tang benoka aliba Labour Code ya bill asem; Industrial Relations (IR) Code, Occupational Safety, Health aser Working Conditions (OSH) Code, aser Social Security Code, den Code on Wages, 2019, amalgamating 44 labour laws ajanga adokdaksüba lir.

Code ajak ya taa, industrial relations, social security, safety, aser welfare conditions dak sendaka lir, koba India ya Asia nung economy tulutiba rongnung tasembuba kümdaksütsü nükjiding nung benokba lir.

Hawaii asetkong ka nung morok mi agi nisung 36 rongset

Lahaina, Luroi/August 10 (Agencies): Hawaii indang Maui asetkong nung aliba Lahaina jila nung mopung dener morok mi adoka nisung 36 rongsenogo aser ano nisung meyerijang aika tesem balalai jena ao.

"Mi remsepba maparen maneni inyakdang tanü nisung 36 asüba jangjaogo," ta Maui county governor-i Brehostibarnü sangdong ka nung ashi.

United States island state nung morok mi ya Mongulbarnep adoka Maui nung nisung 35,000 dak tema aser ano nisung aliba ki aser business amala lendong nung lir, ta Hawaii Emergency Management Agency ajanga Bodhbarnü sangdong ka nung shia liasü.

Hurricane Dora ajanga mopung sashia aonba agi mi kanga kera kaoloka ao aser nüburttem tzüym leni

asemtepa ao. Social media nung video ka lemsatepba nung morok mi ya Lahaina tiyong ajanga jangrua ao, koba tzükum anasa nisung 12,000 shi aliba jila ka lir.

"Iba lendong ya kü tenük agi anguba rongnung tamajungtiba lir. Lahaina mitsü kuma rongdokogo. Ibai alima tatemang mesük," ta yangji alir Mason Jarvi-i ashi.

Lahaina nung ki 270 dak tema samatsü mesüra raksatsü. "Maui kübok Lahaina tuluba raksaogo aser yangi alir kibong noklang aika tesem balala nung jenoka lir," ta iba jila indang governor Josh Green-i ashi.

Morok mi agi raksatsür aliba tesem ya "war zone" den kasa lir, ta Hawaii Emergency Management Agency odongtar Adam Weintraub-i ashi.

"Tayimtsü nungi tangokba noksa tem World War II mapang Dresden noksa

mesüker," ta Weintraub-i Germany yimti ka Allied forces temi bomb agi poksatsüba athishia ashi.

Iba morok mi agi kongshir aliba tesemtem nung teyari balala Brehostibarnü atong saka mi ajanga tesem kar nung teyari magütsüteter aser osangtsüsang magitepteter, anungji rescue services aser teyari agütsüba nung timtem ajurur, ta pai ashi.

Bodhbarnüa Maui nung American Red Cross ajanga nisung 2,100 shi anitena tesem balala nung yua liasü.

"Maui asetkong semdangertem aser tesem balala nung prokshia alirtem nem anisüngzük agütsütsü mesüra senzüsempoktsü lenmang bushitsüba nung onoki county, American Red Cross aser Honolulu county nung külem tenzükertem den yaritepa inyaker," ta Weintraub-isa ashi.

Tunisia nungi meindokba sülen lisem lima nung nisung 27 tasü ngutet

Misrata, Luroi/August 10 (Agencies): Tunisia nungi Libya arütsü tsütsü meinzüka yoka lisem lima tatsük nung yutsüba sülen tawa anogo ishika tsüngta sub-Saharan Africa nungi nisung 27 shi süogo, ta Libya ketdangsür temi ashir.

"Northern crossing south tsütsü lisem dang aliba tesem tuluka nung Libyan border guards temi tasü mang ya angu," ta Libya nung Misrata yimti nungi osangbener kati Bodhbarnü ashi.

"Yangji temperatures ya 40 degrees Celsius (104 degrees Fahrenheit) dang tatsükba lir aser refugee aser migrant temi ashiba agi parnok tzü, chiyongtsü mesüra jenokdak makai anogo aika jajadaktsü," ta osangbeneri ashi.

Meyi tiyong nung Tunisia-i refugee aser migrant tem arütsü alema jila mesüra yimtsüng malileni meinzüka

yoker, ta Libyan border guards aser rights group temi ashir.

Rongnendak Sfax yimti nung anogo aika rongrong adoka Tunisia nung ka tepsetba sülen July ita nungi tenzük Tunisia-i Black African migrants aser asylum bushirtem meindok tenzük.

Yangji alirtemi refugee tem yimya majungba indang ashishia liasü aser refugee temi ashiba agi, parnok temang sentsü nung ajemdaker lendong timtem balala ajurur.

Libyan border guards temi ashiba agi, Tunisia nungi meindokba sülen anogo shia nisung 150 shi Libya-i aiter.

"Kü kinungbo ya aayanger ka lir. Tunisia nung pa dak züka merenshi aser mezümgmeshia amshi. Anogo ana lir onok arütsü leni anir ao aser onok dak züker yangji yutsü," ta nisung kati osangbener dang ashi.

Anü tatsük nung la ghonda aika jajaba sülen Libyan

ketdangsür temi angu.

Tunisia indang Ministry of the Interior ajanga refugee aser migrants tem lisem lima nung metoktsü ta ashir. Tir Kais Saied-ibo item osang ya tiaüzü aser linük tenüng menüktsütsü asoshi prokshiba lir ta ashir.

"African immigrants tem meindoker ta tai tongloksüba ajak Tunisia-i magizüker," ta Interior Ministry odongtar Faker Bouzgayya-i tan hopta osangbener dang shia liasü.

"Tunisia-i aittsü ozüing agi melartem aitdaktsütsü. Arütsü alema orr atalokba Tunisia khuret masü," ta pai ashi.

Tunisia nung aliba migrants aser refugee tem arütsülen nisung malidaki yokba aser arütsü alema yokba atema tebilemstü akar, ta taoba ita International Organization for Migration aser Office of the United Nations High Commissioner for Refugees ajanga shia liasü.

Ecuador indang presidential candidate Fernando Villavicencio khaset

Quinto, Luroi/August 10 (Agencies): Ecuador nung presidential election atema candidate ka nübuyimba mapang khaset, shiba ochimashi aser mapa tamajung inyakba telok-telok anema nokdaka liasü.

Ecuador national assembly züingsem Fernando Villavicencio ya Bodhbarnü linük yimtiba, Quinto nung sentong ka nungi aoba mapang amak.

Ecuador nung 'organised crime' aser sorkar ketdangsür tsüngta candidate ishika sendaktepa lir ta tai temolung melemi alirtem rongnung pa ya ka lir.

Mapa tamajung inyakba telok Los Lobos (The Wolves) ajanga iba azüdokshi tenüng agiogo.

Los Lobos ya Ecuador nung

gang tulutiba rongnung tanabuba jenjang nung lir, kong züingsem 8,000 shi lir aser parnok ya timba tepuokdak lir.

Tawa tepuokdak tesemtem nung azüdokshiba nung iba telok ya dena lir, kong tepuokdak alir nisung aika tepset.

Los Choneros gang nungi razüka aoba Los Lobos ya Mexico nung aliba Jalisco New Generation Cartel (CJNG) den sendaktepa lir südi ta amanger, shirnoki cocaine shibelener.

Fernando Villavicencio tepsetba atema mezüingbo Los Choneros dak temolung melemi liasü, kechiaser taoba hopta parnoki Villavicencio amokmerena liasü, saka video ka nung Los Lobos teloki tenüng agi, kong iba telok züingsemtem balaclavas agir parnok temaitsü sayua

prangbong sayua liasü.

Latin America nung Ecuador ya akhi mapang nungi lendong timtem maliba linük ka liasü, saka Colombian aser Mexican drug cartels tem aliba ajanga mapa tamajung inyakba tali kumogo.

Ecuador nung tir election agitsü hopta ana majung lia iba lendong ya ataloker, aser iba election nübuyim nung 'insecurity' indang kanga jembia liasü.

Anasa aliba Colombia aser Peru nungi adokba cocaine tem US aser Europe leni shibelentsü atema cartels temi Ecuador amshir, kong ki o jen tajung aser rongnendak tesem tulu lir.

Parnok nem tetsükdaktsü agütsür ama bilemer ajak parnoki amokmerener.

Fernando Villavicencio ya

Mulungnen O

Aso:
07-07-1929



Asü:
06-08-2023

Tsürabur **Asür Merangtsüngla (Chungtia)** August 6, 2023 anogo la shilem akümüli wadang takok nung renemer teti anisüngzükdak limai pila ogo.

Onok mangyim tia nung alidang kija, kibong aser lokti balala shirnokisa sarasadem, nübu aser senti rongsen agi nungita yariogo, nenok ajak dang kanga pelaba lemsateper.

Tsüngremi nenok ajak moajangma.
Temeim Chirnurtem, Semchirtem aser Kinunger

Pelaba Lemsateper

TASOBA
15-11-2001



TASÜBA
04-08-2023

Onoki teti meima aliba jabaso asür **Imnamoa Pongen** shirangba anogo nungi tasüba anogo tashi, kiyonger, medemer, kinunger shirnokisa ozü den yaritepogo, nenok ajak dang kangasa pelar, teyanglur Tsüngrem-i nenok moajangma ta ozü sarasadem.

Temeim, Oja, Auntiy aser Oya, Odi nungertem.

BRANCH LOKTEPBA INDANG SANGDONGER

Onoki agütsüba service balala tashi itshitsü atema Canara Bank indang item branches belenshitsü aser Canara Bank indang tanga branches den lokteptsü aser **11.08.2023** anogo nungi tenzük address tasenba nung Banking business tapu balala indang services agütsütsü.

Sl. No.	Branch Name (DP Code)	New DP Code	New Address
1	Dimapur II	3490	1st Floor, Latika Complex, Nyamo Lotha Road (Church Road), Pin - 797 112

Temalen shia aliba branches nung onok customers-i amalitepba atema pelar aser onok indang base branch nung resources tajungtiba lir, anungji onok indang customres nem ano services tajungtiba agütsütsü ta metetdaksür.

Sd/-
Place : Guwahati
Date : 11.08.2023

General Manager
Circle Office-Guwahati

Premises Section, Circle Office, Guwahati
Dee Bee Grande, Panjabari Road, Six Miles
Guwahati - 781 022

congress züingsem teinyakdak aser taoba mapang osangbener ka liasü, aser mapa tamajung inyakba telok asoshi ozüing tesashi yanglua mali ta pai aitsü aser pa tir akumnungbo mapa tamajung inyakba telok balala anema nokdaktsü, ta shia liasü.

Villavicencio ya kibong kumer aser tanur pongu liasü, aser election round mezüingbuba nung candidate ti aliba nungi pa ka liasü - ajisiüka pa tejaklena masü saka tiyonglen liasü.

Ecuador nung yimten yimsüsür tepsetba pa ya mezüingbuba masü. Taoba ita Manta yimti indang mayor khaset aser February ita nunga Puerto Lopez yimti nung mayor inyaknüa aliba candidate ka tepset.

Ajisiüka linük yimtiba nung sentong tulu alidang presidential candidate khasetba ya tasü ita inyakba mapa ka lir aser mapa tamajung inyakba telok tashi aitba kuli lir.

Villavicencio ta nikongdang 6:20 ako (par mapang) meta nübuyim sentong yutsür aoba mapang iba lendong ya atalok.

Iba sentong ya Quito indang financial district nung taoba mapang school aliba ki ka nung agia liasü.

Arishi küm 59 tain Villavicencio ya iba ki kima gari kati aiba mapang prangbong ola angashi, kong mapang tatsüka jakdang voters tem den ajurutepa liasü.

"Onok school nungi metre ishika dang pilar lia onok dak injang 40 shi khaloktsü," ta Villavicencio tebotanubo Galo Valencia-i ashi.

(Maneni tapak 8 nung...)

Lauren James nem asaya ana atema tenokdangba agütsü



Luroi/August 10, 2023 (Agencies): Tetsür World Cup nung England aser Nigeria na asayaba mapang Nigeria tsür Michelle Alozie dak ajemoktsüba atema Lauren James nem asaya ana atema tenokdangba agütsüogo, iba tetezü la England team Colombia den quarter-final asayaba mapang la masayatetsü, ta FIFA-i Brehostibarnü metetdaksü.

James, shiba iba asayamung nung England tsürtem rongnungi goal (3) timtiba idaktsüba asayar lir, la nem Hombarnü Nigeria den asayaba mapang minute 87buba nung Alozie dak ajemoktsüba atema red card agüja liasü.

Mongolbarnü arishi küm 21 tain asayar yagi iba tatalokba asoshi tatok meshiogo. Asaya ana atema tenokdangba agütsüba sülen la England team

semi-final-i ira iba asaya nunga shilem magitetsü.

Iba asaya nung asaya minute 30 anunga lia England team nung asayar 10 dang aküm ajisiüka parnoki kanga meranga nokdanga asaya goal 0-0 nung tembang aser penalty metsütepba sülen Nigeria madak takok ngua liasü.

"FIFA Disciplinary Committee-i England nung asayar Lauren James nem asaya ana atema tenokdangba agütsüogo," ta FIFA-i sangdong ka ajanga metetdaksü.

"Tenokdangba agütsüba ya FIFA Women's World Cup quarter-final nung benoktsü aser iba sülen international asaya koba tama asayadir idangji benoktsü," ta kasa sangdong ajanga metetdaksü.

Honibarnü England team Colombia den asayatsü. Iba temerenshi agütsüba dak sendakba nung Football Association (FA)-i kecha telangzüba magütsü.

BAI National Center of Excellence coach asütsü Handoyo shimogo

Luroi/August 10, 2023 (Agencies): Guwahati National Center of Excellence nung kija asaya head coach asütsü Indonesia nung Mulyo Handoyo shimogo aser Badminton Association of India (BAI)-isa iba facility tasenba atema bendanger coach ana anisemogo.

Taoba mapang All England champion Russia nung Ivan Sozonov, tarep asaya coach asütsü aser Korea nung coach Park Tae-sang, shiba lenisüba nung PV Sindhu-i Tokyo Olympics nung bronze medal ngua liasü pa bendanger coach tem rongnung tasembuba lir.

Parnok asem dak alia iba centre nung inyaktsü atema India nung coach-a ishika shima lir.

NCE ya Assam sorkar aser BAI na longjemer tenzüka lir aser iba centre ya Guwahati nung Hokolbarnü lapoktsü. Iba state-of-the-art facility nung court 24 lir aser iba den hostel facilities, gym ka aser yoga centre ka lir. Iba facility nung terpranger 3000 asemtsü.

"Iba centre atema BAI sentong tulu lir aser Mulyo, Sozonov aser Park ta coach



Mulyo Handoyo

asem shimba ya mezüngbuba jenjang agiba lir," ta BAI General Secretary, Sanjay Mishra-i PTI dang ashi.

Tang tashi nung Hyderabad nung Pullela Gopichand Badminton Academy aser Bangalore nung Padukone-Dravid Centre for Sports Excellence nungi dang India nung asayar aniteta aser timba training agia arudar.

Iba NCE nung temaba jenjang nung aliba bendanger coach tem anir aruba ajanga India nung badminton asaya ajungkettsü, kechiyong tangbo junior camp tem aser senior camp tem karbo iba centre nung ayongzüka agitetsü.

Mulyo, shiba lenisüba nung 2004 Athens Olympic nung

Taufik Hidayat-i gold medal ngua liasü, pa India national team nung küm ka inyakba mapang temelenshi aika bener arutsüogo.

2017 küm pa India team coach asüba mapang Kidambi Srikanth-i Super Series asayamung pezü akok aser B Sai Praneeth-i ka koka liasü. 2018 küm tetenzüklen pai mapa toktsü aser Singapore team nung oa aden.

Arishi küm 34 tain Ivan aser pa indang partner Vladimir Ivanov-i 2016 küm All England Championships kokogo aser Tokyo Olympics nunga shilem agia liasü. Kasa mapang nung Park aser Sindhu na taküm küm tetenzüklen pila liasü.

Ecuador indang presidential...

Valencia-i ashiba agi, Villavicencio dak tekolak nung injang asem agi khashi.

Ano tenük kuli alir Carlos Figueroa-i ashiba agi, pa (Fernando Villavicencio) ayazüker second 30 shi lir khatap tenzü.

Ki telung nungi video tangokba nung pa bukumertem atsükshia liasü. Iba lendong

nung linük indang assembly atema candidate ka aser police ana densema nisung toku yirua liasü, ta prosecutor temi ashi.

Villavicencio khasetsang ya security den khatapba mapang yiru aser mapang tatsüka lir asü, ta linük indang attorney general ajanga social media nung ashi. Villavicencio tepsetba dak

(Tapak 7 nungi...)

sendakba nung Quito nung tesem kar meita aoba sülen police temi nisung trok apu, ta parnoki ashi.

Iba lendong atalokba sülen Ecuador nung state of emergency sangdongogo aser tang teinyakdak Tir Guillermo Lasso-i aibelener memerenshi metoktsütsü nangzü.

BWF Championships 2023 atema fixture sangdongogo

Luroi/August 10, 2023 (Agencies): Brehostibarnü sayaba BWF World Championships fixture nung India tsürtem rongnungi nungtugu badminton asayar PV Sindhu aser teburtem rongnungi tarep asayar Satwiksairaj Rankireddy aser Chirag Shetty nung mezüngbuba round atema bye nguogo.

28buba World Championships koba August 21 nungi 27 tashi Copenhagen, Denmark nung asayatsü lir iba asayamung atema draw ya Malaysia yimtiba kübok Badminton World Federation headquarters nung süa liasü.

Taoba world champion Sindhu, iba asayamung nung tetsür kija asaya nung seed 16buba nung lir. La iba asayamung nung tanabuba round nungi asayatsü aser la tanabuba round nung Vietnam tsür Thuy Linh Nguyen mesüra Japan tsür Nozomi Okuhara na rongnung ka den asayatsü.

Temetetsü kaji Okuhara-i 2017 world badminton championships final nung Sindhu kokogo saka 2019 küm final nungbo Sindhu-i takok ngua liasü.

Tebur tarep asaya nung tanabuba seed nung aliba asayar Satwiksairaj Rankireddy aser Chirag Shetty na tanabuba

round nung Ireland nung tarep Joshua Magee aser Paul Reynolds na mesüra Australian nung tarep Kenneth Zhe Hooi Choo aser Ming Chuen Lim na den asayatsü.

Kasa mapang nung tebur kija asaya nung India nung rongnung temaba jenjang nung aliba asayar HS Prannoy mezüngbuba round nung Finland nung world no. 56 asayar Kalle Koljonen den asayatsü. 2021 küm iba asayamung nung Bronze medal ngur alisang Lakshya Sen, Mauritius nung world No. 110 asayar Georges Julien Paul den asayatsü.

Tebur kija asaya nunga Kidambi Srikanth mezüngbuba round nung Japan nung asayar Kenta Nishimoto den asayatsü.

Tetsür tarep asaya nung Treesa Jolly aser Gayatri Gopichand nata mezüngbuba round atema bye nguogo aser tena tanabuba round nung Chinese Taipei tsür Chang Ching Hui aser Yang Chin Tun na mesüra Estonia tsür Kati-Kreet Marran aser Helina Ruutel na rongnung ka den asayatsü.

Tarep temeyoktep asaya nung Rohan Kapoor aser N. Sikki Reddy na Scotland nung tarep Adam Hall aser Julie MacPherson na den mezüng asayatsü.

Kerala Blasters aser Ishan na küm 2 atema tenangzüktepba yangluogo

Luroi/August 10, 2023 (Agencies): Kerala Blasters-i sangdong ka ajanga Ishan Pandita den 2025 küm tashi küm ana atema tenangzüktepba yangluba sangdongogo.

Pandita-i tang tashi nung Indian Super League Shield (ISL) nung FC Goa, Jamshedpur FC nungi asaya 50 dak tema nung shilem agir lir aser iba mapang pai asayamung balala nung goal 10 idaktsüogo.

Arishi küm 25 tain asayar alitsü atema East Bengal FC aser Chennaiyin FC nata tejangraba liasü saka pai Kochi nung amendaker aliba iba ISL club nungi asayatsü asoshi telemtetba agia liasü.

"India ajunga nung nüburtemi aikati kanga dang saklokba aser asaya asoshi bendanga agütsüba club ka nung densemba atema kanga pelar. KBFC ketdangsurtemi asayar ka ama kü indang sempet dak tamang katetba sayuba atema pelar. Kü atema iba transfer window ya kanga talang liasü saka ni telemtetba shitak agiogo

ta bilemer. Ni fan aser club atema takokba tashi meranga asayatsü matateter," ta Ishan Pandita-i ashi.

Club nung adenba sülen Pandita 2023 Durand Cup campign atema Kolkata nung KBFC teammate tasentem den longjemtsü.

Kerala Blasters-i iba transfer window nung Mohun Bagan Super Giants aser Bengaluru FC nungi Pritam Kotal aser Prabir Das na alizükogo aser ano BFC nungi Lara Sharma laon nung anir aruogo. Maneni parnoki Newcastle Jets FC nungi Jaushua Sotirio alizükogo, saka pa training mapang tetsüng yirur lir.

Asayar alizükba dang masü KBFC nungia asayar kar tanga club-iogo. Ayush Adhikari Chennaiyin FC-iogo aser Prabhsukhan Gill, Harmanjot Khabra aser Nishu Kumar (loan) nung East Bengal FC-i ogo. Jessel Carneiro Bengaluru FC-i ogo aser Sahal Abdul Samad-a Mohun Bagan SG-i alizükogo.

BILEMDANGANG

"Anema dang lira ajak takoktsü lir."